

大方廣佛華嚴經普賢菩薩行願品卷第二十一 美一

大方廣佛華嚴經卷第二十一 羌一

唐罽賓國三藏般若奉 詔譯

入不思議解脫境界普賢行願品

爾時善財童子於普救衆生威德吉祥夜神  
所聞菩薩普現一切世間調伏衆生解脫門

羌一

及得一切如來現前三昧超出一切衆生莊

嚴三昧得如是等十千三昧皆悉修習起深

信解光明普照周徧隨順趣入遊履廣大出

生自在作用漸次前行往詣具足功德寂靜

音海夜神所頂禮其足遶無數帀合掌恭敬

而作是言聖者我已先發阿耨多羅三藐三  
菩提心我依善知識故學菩薩行修菩薩行  
入菩薩行住菩薩行我願出生一切智海不  
思議法唯願慈哀爲我宣說菩薩云何學菩  
薩行云何修菩薩道時彼夜神告善財言善  
哉善哉善男子汝能依止諸善知識求菩薩  
行善男子我得菩薩念念出生廣大歡喜莊  
嚴解脫門善財言大聖此解脫門爲何事業  
行何境界修何方便作何觀察夜神言善男  
子我發起清淨平等樂欲心我發起離一切

世間塵垢清淨堅固莊嚴心我發起於一切  
事難作能作決定不退心我發起莊嚴一切  
功德寶山猶如須彌處金輪上永不傾動心  
我發起於一切處無所住著心我發起普現  
一切衆生前皆能救護心我發起見一切佛  
海無有厭足心我發起求一切菩薩清淨願  
力心我發起住普徧大智光明海心我發起  
令一切衆生超過憂惱生死曠野心我發起  
令一切衆生捨離愁歎衆苦心我發起令一  
切衆生捨離種種不可意色聲香味觸法心

我發起令一切衆生捨離種種恩愛別離怨  
憎會苦心我發起令一切衆生捨離種種惡  
業因緣愚癡等苦心我發起與一切惡趣險  
難衆生作救護心我發起令一切衆生出生  
死苦顯示正道心我發起令一切衆生捨離  
生老病死等苦心我發起令一切衆生成就  
如來無上法樂心我發起令一切衆生皆受  
清淨大喜樂心我發起令一切衆生修行正  
行無厄難心發是心已復爲說法令其漸至  
一切智地所謂若見衆生樂著所住宮殿屋

卷一

一

宅我爲說法令其了達諸法本性離諸執著  
若見衆生戀著父母兄弟親屬我爲說法令  
其得入諸佛菩薩清淨衆會若見衆生戀著  
妻子情無捨離我爲說法令其捨離生死愛  
染起大悲心於一切衆生平等無二若見衆  
生戀著市肆塵里集會我爲說法令其得與  
衆聖集會若見衆生貪著資具我爲說法令  
其具足諸波羅蜜若見衆生愛著音樂我爲  
說法令其愛樂清淨法樂若見衆生著五欲  
境我爲說法令其得入如來境界若見衆生

多起瞋恚我爲說法令住如來忍波羅蜜若  
見衆生其心懈怠我爲說法令得清淨勤波  
羅蜜若見衆生其心散亂我爲說法令得如  
來禪波羅蜜若見衆生入見稠林無明暗障  
我爲說法令得出離稠林黑暗若見衆生無  
有智慧我爲說法令其成就般若波羅蜜若  
見衆生染著三界我爲說法令於生死心無  
取捨而得安住方便波羅蜜若見衆生志意  
下劣我爲說法令其圓滿佛菩提願若見衆  
生但求自利我爲說法令其發起平等利益

卷一

三

諸衆生願若見衆生志樂微弱我爲說法令  
得菩薩力波羅蜜若見衆生愚癡黑闇我爲  
說法令得如來究竟清淨智波羅蜜若見衆  
生色相不具我爲說法令得如來圓滿色身  
若見衆生形容醜陋我爲說法令得無上清  
淨法身若見衆生色相麤惡我爲說法令得  
微細金色皮膚若見衆生諸苦逼迫我爲說  
法令得如來最極安樂若見衆生種種安樂  
我爲說法令其安住一切智樂若見衆生種  
種病苦我爲說法令其成就如影像身若見

衆生積集色愛我爲說法令其愛樂諸菩薩  
行若見衆生貧窮所困我爲說法令得菩薩  
功德寶藏若見衆生樂止園林我爲說法令  
其供養承事諸佛住法園苑若見衆生遊行  
道路我爲說法令其趣向一切智道若見衆  
生樂居村邑我爲說法令出三界若見衆生  
樂住聚落我爲說法令其超越二乘之道住  
如來地若見衆生樂住城郭我爲說法令其  
得住法王城中若見衆生樂止四隅我爲說  
法令得三世平等智慧若見衆生樂止諸方

我爲說法令得智慧見一切法若見衆生貪  
行多者我爲彼說不淨觀門令其捨離生死  
渴愛若見衆生瞋行多者我爲彼說大慈觀  
門令勤修習心無惱害若見衆生癡行多者  
我爲說法令得智眼觀諸法海若見衆生等

羌一

四

分行者我爲說法令其得入一切勝智諸大  
願海若見衆生樂生死樂我爲說法令其厭  
離若見衆生厭生死苦應爲如來之所化者  
我爲說法令悟無生示現受生若見衆生愛  
著五蘊我爲說法令其得住無依境界若見

衆生其心下劣我爲顯示勝莊嚴道若見衆  
生心生憍慢爲說如來平等法忍若見衆生  
其心諂曲爲說菩薩清淨直心善男子我以  
如是無量法施攝諸衆生種種方便教化調  
伏令離惡道受人天樂脫三界縛住一切智  
我時便得廣大歡喜法光明海速疾愛樂甚  
深圓滿其心怡暢安隱適悅復次善男子我  
常觀察一切菩薩道場衆海修種種願行現  
種種淨身有種種常光放種種光明以種種  
方便入一切智門入種種三昧現種種神變

出種種音聲海具種種莊嚴身入種種如來  
門詣種種國土海見種種諸佛海得種種辯  
才海照種種解脫境得種種智光海入種種  
三昧海遊戲種種解脫宮殿以種種門趣一  
切智以莊嚴雲覆虛空界觀察種種道場衆

羌一

五

會集種種世界入種種佛刹詣種種方海受  
種種如來命從種種如來所與種種菩薩俱  
雨種種莊嚴雲入如來種種方便觀如來種  
種法海思如來種種神通門順如來種種智  
慧海往如來種種殊勝會坐如來種種莊嚴

座善男子我觀察此道場衆會知佛神力無  
量無邊生大歡喜善男子我觀毗盧遮那如  
來念念出現不思議色身既見是已生大歡  
喜又觀如來於念念中放大光明充滿無邊  
廣大法界既見是已生大歡喜又見如來一  
一毛孔念念出現無量佛刹極微塵數光明  
海一一光明以無量佛刹極微塵數光明而  
爲眷屬一周徧一切法界銷滅一切諸衆  
生苦既見是已生大歡喜又善男子我觀如  
來頂及兩肩念念出現一切佛刹極微塵數

寶焰山雲充滿十方一切法界既見是已生  
大歡喜又善男子我觀如來一一毛孔於念  
念中出一切佛刹極微塵數香光明雲充滿  
十方一切佛刹既見是已生大歡喜又善男  
子我觀如來一一相海於念念中出一切佛  
刹極微塵數諸相莊嚴如來身雲徧徃十方  
一切世界既見是已生大歡喜又善男子我  
觀如來一一隨好於念念中出一切佛刹極  
微塵數隨好光明如來身雲既見是已生大  
歡喜又善男子我觀如來一一毛孔於念念

中出不可說不可說佛刹極微塵數佛變化  
雲示現如來從初發心修波羅蜜具莊嚴道  
入菩薩地遊戲菩薩種種神力既見是已生  
大歡喜又善男子我觀如來一一毛孔念念  
出現不可說不可說佛刹極微塵數天王身

羌一

六

雲及以天王自在神變充徧一切十方法界  
應以天王身而得度者即現其前而爲說法  
既見是已生大歡喜又善男子我觀如來一  
一毛孔念念出現不可說不可說佛刹極微  
塵數龍王身雲夜叉王身雲乾闥婆王身雲

阿脩羅王身雲迦樓羅王身雲緊那羅王身  
雲摩睺羅迦王身雲人王身雲梵王身雲莫  
不念念毛孔中現如是神變如是身相如是  
言音如是說法我見是已於念念中生大歡  
喜廣大信樂量與法界薩婆若等昔所未得  
而今始得昔所未解而今始解昔所未證而  
今始證昔所未入而今始入昔所未滿而今  
始滿昔所未見而今始見昔所未聞而今始  
聞何以故以能了知法界相故知一切法唯  
一相故能平等入三世道故能說一切無邊

法故善男子我入此菩薩念念出生廣大歡  
喜莊嚴解脫光明海又善男子此解脫無邊  
普入一切法界門故此解脫無盡等發一切  
智性心故此解脫無量菩薩智眼所知境故  
此解脫無際入無際畔一切衆生心想中故

差一

七

此解脫甚深寂靜智慧所觀察故此解脫廣  
大周徧一切如來境故此解脫無壞菩薩智  
眼之所知故此解脫無底盡於法界之源底  
故此解脫者即是普門於一事中普徧出生  
諸神變故此解脫者體性不空一切法身等

無二故此解脫者終無有生以能了知如幻  
法故此解脫者猶如影像一切智願光所生  
故此解脫者猶如變化諸菩薩行妙變化故  
此解脫者猶如大地爲一切衆生所依處故  
此解脫者猶如大水能以大悲潤一切故此  
解脫者猶如大火乾竭衆生貪愛水故此解  
脫者猶如大風令諸衆生速疾趣於一切智  
故此解脫者猶如大海衆功德寶莊嚴一切  
諸衆生故此解脫者如須彌山出一切智法  
寶海故此解脫者如天宮殿一切妙法所莊

嚴故此解脫者猶如虛空普容三世一切如  
來神通力故此解脫者猶如大雲普爲衆生  
雨法雨故此解脫者猶如淨日能破衆生無  
知闇故此解脫者猶如滿月滿足廣大福智  
海故此解脫者猶如如來於一切處正徧知  
故此解脫者猶如自影從自善業所化出故  
此解脫者猶如谷響隨其所應爲說法故此  
解脫者猶如影像隨衆生心而照現故此解  
脫者如大樹王開敷一切神通華故此解脫  
者猶如金剛從本已來不可壞故此解脫者

如如意珠出生無量自在力故此解脫者如  
離垢藏摩尼寶王示現一切三世如來諸神  
變故此解脫者猶如喜幢妙摩尼寶能平等  
出一切諸佛法輪聲故善男子我今爲汝種  
種稱讚此解脫門無比希有真實功德難解  
難入難信難知羌一汝應思惟隨順悟入爾時善  
財童子白夜神言聖者云何修行得此解脫  
具足圓滿夜神言善男子菩薩修行十大法  
藏積集圓滿光明徧照愛樂出生威力自在  
則能成就此解脫門何等爲十一修布施廣

大法藏隨衆生心悉令滿足二修淨戒廣大  
法藏普入一切佛功德海三修安忍廣大法  
藏能徧思惟一切法性四修精進廣大法藏  
趣一切智恒無退轉五修禪定廣大法藏能  
滅一切衆生熱惱六修般若廣大法藏能徧  
了知一切法海七修方便廣大法藏能徧成  
熟諸衆生海八修諸願廣大法藏能徧遊入  
諸佛刹海爲諸衆生盡未來劫修菩薩行九  
修諸力廣大法藏能念念中現於一切法界  
教海於一切刹成等正覺常無休息十修淨

智廣大法藏能得如來清淨妙智徧知三世  
一切諸法無有障礙善男子若諸菩薩安住  
如是十大法藏則能獲得如是解脫清淨增  
長積集具足出生堅固廣大成就安住圓滿  
善財白言聖者汝發阿耨多羅三藐三菩提  
羌一  
心其已久如夜神言善男子此華藏莊嚴世  
九  
界海東過千世界海有世界海名一切淨光  
衆寶莊嚴有世界種名大願光明音中有世  
界名無垢金光莊嚴以一切香金剛摩尼王  
爲體形如樓閣衆妙寶雲以爲其際住於一

切寶瓔珞海妙宮殿雲而覆其上淨穢相雜  
彼世界中乃徃古世有劫名普照光幢有國  
名普寶吉祥藏有菩提場名一切寶藏衆色  
光明有佛名不退轉法界妙音於此場中成  
等正覺我於爾時作菩提樹神名福德燈光  
明幢守護道場見彼如來成等正覺示現種  
種自在神力發阿耨多羅三藐三菩提心即  
於此時獲得三昧名普照如來功德海彼道  
場中次有如來出興於世名法樹威德山王  
我時命終還生於此爲道場主夜神名吉祥

福智光明見彼如來轉正法輪現大神通即  
得三昧名普照一切離貪境界次有如來出  
興於世名一切法海音聲王我爲夜神因得  
見佛種種承事供養恭敬心生歡喜即獲三  
昧名增長一切善法地次有如來出興於世  
名寶光明燈幢王我爲夜神因得見佛承事  
供養令其歡喜即獲三昧名普現神通光明  
雲次有如來出興於世名功德須彌光威德  
王我爲夜神因得見佛承事供養令得歡喜  
即獲三昧名普照諸佛海次有如來出興於

世名法雲妙音聲王我爲夜神因得見佛承  
事供養令心歡喜即獲三昧名一切法海燈  
次有如來出興於世名智炬光照王我爲夜  
神因得見佛承事供養令其歡喜即獲三昧  
名滅一切衆生苦光照燈次有如來出興於

羌一

十

世名妙法神通速疾幢我爲夜神因得見佛  
承事供養心大歡喜即獲三昧名三世如來  
所行光明藏次有如來出興於世名法燈勇  
猛智慧師子王我爲夜神因得見佛承事供  
養令生歡喜即獲三昧名一切世間無礙智

輪威德光次有如來出興於世名智力具足  
威德王我爲夜神因得見佛承事供養令心  
歡喜即獲三昧名普照三世衆生根行影像  
如是善男子彼無垢金光莊嚴世界普照光  
明幢劫中有如是等十佛刹極微塵數如來  
出興於世我於彼時或爲天王或爲龍王或  
爲夜叉王或爲乾闥婆王或爲阿脩羅王或  
爲迦樓羅王或爲緊那羅王或爲摩睺羅伽  
王或爲人王或爲梵王或爲天身或爲人身  
或爲男子身或爲女人身或爲童男身或爲

童女身悉以種種諸供養具恭敬供養尊重  
承事彼諸如來亦聞諸佛所說妙法悉皆聽  
受憶持不忘從此命終還即於此世界中生  
經於佛刹極微塵數劫修行菩薩種種妙行  
然後壽終生此華藏莊嚴世界海中娑婆世

先一

十一

界值迦羅鳩孫馱如來承事供養令生歡喜  
得三昧名離一切塵垢影像光明次值拘那  
含牟尼如來承事供養令生歡喜得三昧名  
普光徧照一切刹海次值迦葉如來承事供  
養令生歡喜得三昧名演一切衆生妙音聲

海次值毗盧遮那如來於此道場成等正覺  
念念示現種種神通廣大威力我時得見即  
獲此念念出生廣大歡喜莊嚴解脫門得此  
解脫已能八十不可說不可說佛刹極微塵  
數法界諸安立海見彼一切法界安立海一  
切佛刹所有極微一一塵中有十不可說不  
可說佛刹極微塵數諸佛國土一一國土皆  
有毗盧遮那如來坐於道場於念念中成等  
正覺現諸神變所現神變一一皆徧一切法  
界海亦見自身在彼一切諸如來所又亦聞

彼一切世界一切如來種種說法我悉聽受  
憶持不忘復次善男子我復見彼一切如來  
一一毛孔出生種種變化海現神通力於十  
方一切法界海一切佛刹海一切世界種一  
切世界中隨諸衆生種種生類種種心性種  
種想行如其所應轉正法輪我得速疾陀羅  
尼力悉能受持一切文義正念思惟以明了  
智普入一切清淨法藏以自在智普遊一切  
甚深法海以周徧智普知三世諸廣大義以  
平等智普達諸佛無差別法我能如是悟解

一切諸佛法門一一法門中悟解一切修多  
羅雲一一修多羅雲中悟解一切法海一一  
法海中悟解一切法品一一法品中悟解一  
切法雲一一法雲中悟解一切法流一一法  
流中出生一切法愛樂海一一法愛樂海出

先一

十二

生一切地一一地中出生一切三昧海一一  
三昧海得一切見佛海一一見佛海得一切  
智光海一一智光海普照三世徧入十方知  
無量如來過去諸行海知無量如來所有本  
事海知無量如來難捨能捨布施波羅蜜海

知無量如來圓滿淨戒波羅蜜海知無量如  
來清淨安忍波羅蜜海知無量如來廣大精  
進波羅蜜海知無量如來圓滿清淨禪波羅  
蜜海知無量如來甚深趣入般若波羅蜜海  
知無量如來種種方便波羅蜜海知無量如  
來種種增長願波羅蜜海知無量如來種種  
成就力波羅蜜海知無量如來種種圓滿智  
波羅蜜海知無量如來過去種種超菩薩地  
無障礙行智光普照海知無量如來過去種  
種住菩薩地無障礙行無量劫海現神通力

知無量如來過去種種圓滿菩薩地知無量  
如來過去種種修習菩薩地知無量如來過  
去種種淨治菩薩地知無量如來過去種種  
觀察菩薩地知無量如來過去為菩薩時常  
見諸佛如影隨形知無量如來過去為菩薩

羌一

十三

時盡見佛海劫海同住知無量如來過去為  
菩薩時以無量身徧生刹海知無量如來過  
去為菩薩時周徧法界修廣大行知無量如  
來過去為菩薩時示現種種諸方便門調伏  
成熟一切衆生知無量如來放大光明普照

十方一切刹海知無量如來現大神力普現一切衆生之前知無量如來廣大智地光明自在知無量如來成正覺神變難思知無量如來轉正法輪悉能受持無有忘失知無量如來示現相海知無量如來示現身海知無量如來廣大境界彼諸如來從初發心乃至法滅如是等法所有勤求相應方便我於念念悉得知見甚深證入善男子汝問我言發心已來爲久如者我念往昔過三佛刹極微塵數劫如上所說於無垢金光莊嚴世界

爲福德燈圓滿光明幢菩提樹神聞不退轉  
法界妙音如來種種說法發阿耨多羅三藐  
三菩提心經二佛刹極微塵數劫種種修行  
諸菩薩行然後生此娑婆世界賢劫之中從  
迦羅鳩孫馱佛至釋迦牟尼佛及此劫中未  
來所有一切如來我皆親近承事供養恭敬  
尊重令生歡喜如此世界賢劫之中供養未  
來一切諸佛一切世界一切劫中所有未來  
一切諸佛悉亦如是親近承事種種供養善  
男子彼無垢金光莊嚴世界今猶現在諸佛

出現相續不斷汝當一心修此菩薩大勇猛  
門爾時具足功德寂靜音海主夜神欲重宣  
此解脫門義爲善財童子而說偈曰

善財汝今聽我說 如是淨妙解脫門

聞已愛樂生歡喜 究竟勤修令悟入

羌一

十四

我昔修行多劫海 生於廣大深信心

常觀法性令現前 速證如空一切智

我於三世諸佛所 咸生廣大信樂心

最勝清淨諸眷屬 悉願承事常親近

我見過去天人師 爲利衆生皆供養

聞此廣大淨法門 其心愛敬生歡喜  
常於父母及師長 尊重恭敬令歡悅  
如是曾無休懈心 於此解脫能深入  
又於老病貧窮人 無主諸根不具足  
經無數劫受輪迴 慈心愍濟令安樂  
濁劫水火及王賊 獅象惡獸諸恐怖  
我昔修行有海中 種種救護令除免  
三有煩惱恒熾然 諸惡業障常纏覆  
隨於生死險難中 我悉救彼令除滅  
一切恐怖惡趣中 種種苦難恒相續

生老病死厄其身 我當救彼咸令出

願盡未來一切劫 普爲苦惱諸羣生

滅除生死使無餘 得佛究竟諸安樂

善男子我唯知此念念速疾出生廣大歡喜

莊嚴解脫門如諸菩薩摩訶薩深入一切法

羌一

十五

界海遠離一切內外苦永除一切諸妄想具

足一切菩薩智悉知一切諸劫數善見一切

刹成壞而我云何能知能說彼功德行善男

子此菩提場如來清淨圓滿會中有主夜神

名守護一切城增長威德汝詣彼問菩薩云

何學菩薩行修菩薩道爾時善財童子一心  
觀察具足功德寂靜音海主夜神身合掌恭  
敬以偈讚曰

我因隨順善友教 今來得詣天神所  
身無邊量等須彌 處座莊嚴皆妙好

非是執著於色相 計有諸法爲依止  
邪見淺識劣智人 而能了知尊境界  
一切世間天及人 於無邊劫常觀察  
不能測度聖天身 色相無量難思故  
天能遠離於諸蘊 亦復不依於界處

普爲衆生出世間 亦現種種神通力  
最勝智眼常清淨 無垢無動無所著  
能觀一切極微中 見佛種種神通力  
仁今身爲正法藏 心智無礙常清淨  
旣得如來智慧光 復照一切諸羣品  
心能普集無邊業 莊嚴一切諸世間  
了一切法皆是心 現身等彼衆生數  
解了世間猶若夢 一切諸佛猶如影  
諸法如響悉皆空 隨心普現而無著  
天能普爲諸衆生 念念現身恒自在

於有於無心不住 常聞說法徧諸方  
無量刹塵諸刹海 及善逝海衆生海  
如是悉在一塵中 此尊解脫境界力  
時善財童子以此妙偈讚彼神已頂禮其足  
遶無數匝殷勤瞻仰辭退而去

先一

十六

大方廣佛華嚴經卷第二十一